

Istražioc, policija i alpinisti četvrti put na lokalitetu jama Radača

Ekshumacije u Mostaru, Nevesinju i Prozoru

U Hercegovini se traga za još 686 nestalih osoba, poručuju iz državnog Instituta

Krajem prošle godine tim istraživača na dubini od oko 50 metara pronašao je prvi nekompletan ljudski skelet u jami Radača, na lokalitetu Goranci kod Mostara. Skelet je odmah proslijeđen u mrtvačnicu u Sutini, gdje se i danas nalazi. U pomenutoj jami, koja se istražuje po četvrti put, prethodno su ekshumirana četiri tijela. Riječ je o tri osobe srpske i jednoj osobi hrvatske nacionalnosti, upoznala nas je Lejla Čengić iz Instituta za nestale osobe BiH.

- Prilikom kasnijih iskopavanja, 2009. i 2012., nije pronađeno niti jedno tijelo, kazala je Čengić, dodajući da su posao tragačima otežale veće količine otpada, dosta zemlje, te eksplozivnih sredstava, što je na koncu ekshumaciju učinilo najdužom od kad traje potraga za nestalim osobama u Bosni i Hercegovini.

Osim vremena, utrošeno je i mnogo rada, ali i sredstava. Uprkos činjenici da nijedna dosadašnja ekshumacija na teritoriju naše zemlje nije trajala tako dugo, Čengić je istakla da radovi u Radači neće stati u skorije vrijeme. Trajat će sve dok se ne pretraži kompletna unutrašnjost prirodne jame, čija dubi-

na iznosi najmanje 80 metara. U pretrazi jame, koja je vrlo zahtjevna i složena, učestvuju i alpinistički timovi specijalnih policajaca iz SIPA, te Federalne uprave policije i MUP-a RS-a. Čengić nas je upoznala da se na području Hercegovine traga za posmrtnim ostacima ukupno 686 nestalih osoba. Riječ je o 486 nestalih Bošnjaka, 99 Hrvata i 101 nestaljoj osobi srpske nacionalnosti. Potvrdila je i da će uskoro u Hercegovini početi još tri ekshumacije.

- Zahtjevi su upućeni Tužilaštvu BiH i očekujemo da bi se uskoro mogle zakazati ekshumacije na području Nevesinja, Mostara i Prozora, zaključila je Čengić.

Adnan DEMIĆ

